

Pahang peruntuk RM20 juta untuk usahawan mikro

Oleh [Asrol Awang](#) - Mac 29, 2022 @ 2:31pm

bhnews@bh.com.my



Menteri Besar, Datuk Seri Wan Rosdy Wan Ismail pada sidang media pengumuman Skim Pembiayaan Kewangan Usahawan Mikro Pahang (I-PUSH) di Kuantan. -Foto NSTP/Asrol Awang

KUANTAN: Kerajaan Pahang memperuntukkan RM20 juta bagi Skim Pembiayaan Kewangan Usahawan Mikro Pahang (I-PUSH) dalam usaha membantu usahawan mikro yang terjejas akibat pandemik wabak COVID-19.

Menteri Besar, Datuk Seri Wan Rosdy Wan Ismail, berkata skim pembiayaan tanpa faedah itu boleh memberikan manfaat kepada 2,500 usahawan mikro.

Katanya, pendaftaran permohonan bermula pada 1 hingga 30 April ini yang menawarkan pembiayaan antara RM3,000 hingga RM10,000 berdasarkan syarat ditetapkan.

"Bagi mengurangkan beban pemohon, pembayaran balik pemberian tanpa faedah turut diperkenalkan dalam skim I-PUSH iaitu lima tahun tempoh pemberian termasuk moratorium diberikan pada tahun pertama.

"Syarat kelayakan berdasarkan keputusan Jawatankuasa Panel Pemilih Skim I-PUSH yang dilantik oleh kerajaan negeri.

"Skim I-PUSH ini adalah inisiatif Kerajaan Pahang yang diumumkan dalam Belanjawan Negeri Pahang 2022 dengan peruntukan sejumlah RM20 juta.

"Secara keseluruhan, Skim I-PUSH yang dilaksanakan tahun ini dapat memberi manfaatkan kepada 2,500 penerima (usahawan mikro) yang terjejas susulan pandemik COVID-19," katanya pada sidang media di Wisma Sri Pahang, sini, hari ini.

Wan Rosdy berkata, menerusi skim I-PUSH, kerajaan negeri akan menjalin hubungan kerjasama dengan bank tempatan sebagai bank pelaksana atau ejen I-PUSH.

Katanya, kerajaan negeri percaya bantuan pemberian itu dapat dicapai kepada kumpulan sasar lebih meluas melalui kerjasama strategik antara kerajaan negeri dengan bank pelaksana yang akan diputuskan kelak.

"Oleh itu, pemohon boleh merujuk panduan permohonan skim I-PUSH yang dimuat naik di portal rasmi <https://smu.pahang.gov.my> bagi mendapatkan maklumat lanjut.

"Kerajaan Pahang sentiasa peka dengan keperluan semasa dan akan terus komited membantu usahawan terjejas bagi menjamin kesejahteraan rakyat Pahang," katanya.